

呂明德先生文集

第十一册

卷二十一之二十三



明德先生文集目錄

卷之二十一

會約

豫簪會約

芝泉會約一

芝泉會約二



明德先生文集卷之二十一

豫簪會約

豫簪會蓋吾輩皆豫產而盍簪長安者故作是會然非  
創爲之敦舊誼也按禹貢豫州厥土惟壤下土墳壚注  
壤雜也壚疏也雜而疏豈豫之風土固有固之與或曰  
豫木彊無群天與善資君子非之曰香火吟賦固非盛  
事何至意見雜而不純情誼疏而不聯不曰君子同道  
爲朋乎易之豫九四曰由豫大有得勿疑朋盍簪我豫  
人旣產於豫當思由豫之義豫五爻皆六獨四爲九九  
者所由以豫者也九陽也健也仁也君子也大有得同

明倫先生文集 卷之二十一  
道也勿疑純也朋盍簪聯也夫是以能豫豫者和也樂  
也有嚶鳴之求而神聽協有素絲之風而委蛇清必曰  
木彊無群如壤之雜墟之疏將君子可以不同道乎雖  
然母諭訛戒鳴豫也母依附規盱豫也母曠職業防冥  
豫也和而不同同而實和於和樂中砥介石之貞乃是  
豫人本色乃始與豫之九四合是不可無會渙群有丘  
蓋取諸渙是必有約慎言節食蓋取諸頤其期七日朋  
來無咎蓋取諸復

一每月逢七日小集寓齋不用包酒不用樂劇

一先期單柬相邀不過數字至日亦用單柬止一速

字

一上席以午未爲期母過晏夜卽告散母流連夜分  
是日當撥冗相過不宜托故屢辭

一四人一卓卓四果四菜十五筩盒一道小圍有無  
隨便母過豐豐則難繼每位班皂給錢四十文不撤  
席

一是會非徒恣杯盤之樂合香火之情蓋吾輩以忠  
君愛國淑身持世爲念當互相砥礪互相發明無負  
古人什優則學之意

一吾輩必直必諒有德業當相勸有過失當相規又

當一味誠實有孚盈缶母阿母競母猜母偽母傾軋  
一坐中母雌黃朝政母臧否人物母講官說缺母謔  
戲母沉酣失容母強不能飲者  
一始終當以敬爲主賓之初筵尤宜三復禮曰樂不  
可極傲不可長

芝泉會約一

學何爲者耶孟子曰乃所願則學孔子也此學字之義  
夫吾曹一生誦讀誰非學孔子者然其所爲學者非也  
人不知學猶可委之無知乃旣學矣而其心不知所學  
所事間有知者言與心違行與言違是非不學之過學

之者過也彼不學者反口實矣嗟乎旣爲父母生養天  
地蓋載褒然做人讀孔子書乃竟昏然與不學同至爲  
彼口實豈不痛哉所以今日只見得孔子是學成的不  
是天生成的至容易至簡便立志要學孔子全不爲博  
好名色拾舊套數但說個學孔子人未免汗流沾背不  
能承任吾邑孟先生非卽我輩人乎不敢學孔子何不  
學先生能學先生卽是學孔子先生更無他異只是平  
平常常葆養此心真實躬行不與言違便是學孔子榜  
樣今人未必能爲先生而孔子之心與先生學孔子之  
心却未嘗無但此心被私意遮蔽多埋沒了假饒省悟

明德先生文集 卷之二十一 三  
未免一念起一念又放下不然又却認賊作子所以朋  
友叅証提醒其益最大易曰君子以朋友講習辟如鏡  
子本明只爲塵翳昏了一經洗磨便見光明本色故吾  
曹今日立個志要學孔子要從先生做學孔子的事習  
不妄習講不空講實實躬行實實向心上証悟方爲真  
學問若只是此等說不肯此等行或未會是此等行既  
會猶是此等行或人前是此等行獨知處又不是此等  
行均之無益於學又無益於會又阻人向學之心須從  
此一刀兩斷做個男子無負天地父母生我一場此志  
一定如盤針司南九澤長途可無迷謬不然是南其轅

而語人曰吾燕之適也而可乎先生成約具在謹廣其  
意爲若干條願諸君子矢自今日否亦今日

計開

一會期用每月一日蓋剝復之交易於証心亦一日克  
已⊗一日用力之義也然以一日証二十九日工夫若  
但以此一日了前件出門又復任意行事遂謂之知向  
學可乎噫憧憧往來朋從爾思不如其已之

一各单月初一日爲大會是日晨興各謁其先人祠定  
省父母畢於辰刻公服詣書院向神一揖一躬候齊恭

拜如常儀

謁神會長監會宜稍前冠帶衣巾另  
爲班各量備壇席鋪地以肅觀瞻

分班二

拜序坐圓揖卑者告坐衆客不必互告

如子弟于祖父父兄伯叔及切

近尊長之在五服內者又如弟子于師及岳父母舅姑夫之類俱應告坐此外雖本族無服尊長及遠親俱在總揖中不必另告後至者向神一揖一躬入班圓揖應告者告

初未見及有他事應另揖者聽但既講書後即不必紛紛出揖事後補揖可也凡卑幼于尊者有後至者俱側立候另揖不必隨衆答揖同會者亦不必彼此紛紛迎送

一坐定鳴講鼓畢即供案應歌詩者出班拱立候齊一躬即擊磬三聲衆皆起歌詩一首仍鳴鐘鼓以節其韻歌畢擊磬二聲一躬入坐衆皆坐又擊磬五聲衆皆起

司講生出班一躬將應講四書及孟先生要語或士大戒明念講說務要明晰易曉畢一躬入坐衆皆坐然後衆相質問或將孝經及他經書若先儒等書反覆叅証或有事情商量大家虛心評論務求實益其論事務協中道或相規勸總之以孝弟爲本躬行爲要不可濶談性命使人無處捉摸却謂孝弟躬行爲無甚緊關者堯舜之道孝弟而已矣最宜玩味

一是日以端慎肅嚴爲主斷不可謔浪恢諧及東西散亂忽來忽去亦不可叙寒溫談朝廷官府一切事體及談人家門事有一于此皆爲煩囂監會即擊磬二聲正

色止之不聽者紀過坐久或更歌詩數首更唱迭和工  
琴者或彈一二曲亦自無妨已而司磬生擊七聲各起  
向神一揖一躬同至露臺圓二揖而散內有不得已事  
先歸者說明向神一揖與衆一躬而退

一凡雙月一日爲常會辰刻便服詣書院其儀節俱同  
大會但不拜

一如公祖父母或達官遠客偶在會者其迎送行坐拜  
立之節各宜斟酌合禮期於上交不諂下交不瀆不必  
過讓以滋勞擾

一會中不言公事有官府則宜更嚴對人不博名色入

衙門則當倍慎若以會所爲講事之地講學作護身之  
符其人可知矣願諸友共戒之違者紀過

一置會簿一首會長會副監會次衆會姓名仍各書字  
書號書年下爲格錄會填到不到及假字以驗勤惰益  
會期旣簡卽有他事亦宜一切放下如萬不得已仍將  
姓名事體書一小帖告於監會斟酌可否仍與執會錄  
會說知不假者一二次紀過三次會簿不列名

一每會輪派一二人執會供具茶果或三四人亦可貧  
者免執務要預至會所整飭神位卓凳水火筆硯之類  
必使肅然執會有事預告另派不得失悞每坐定傳茶



午後傳果餅各就坐位不必紛起

一公舉會長一人副一二人監會三四人必其議論可以闡道躬行可以式俗直諒可以服衆不專論年蓋此數人卽會之領袖會之糾駁及會之史筆也不可參一毫私意致衆不服監會季終一舉其坐次宜稍前以便訂証其行立拜位亦以此爲定

一執會錄講錄會司講司鐘鼓司磬司歌俱會長監會預派應講書程亦要預先議定勿致臨時周章錯亂  
一遠方來學者初至以客論講日仍序長初其後旣爲同會只宜序齒有相知者或備飲饌或餽米菜俱隨其

便但不得過奢亦勿彼此館教以省煩擾

一每會各將一月所心得語或有疑書義或疑難事體各書一二條期于闡發性命實証庸行隨所偶悟當下筆之于紙以便商証雖各人所見未必遽合至理然不妨借以訂入蓋惟悟可以入道非疑何由得悟不然幾虛過此日子矣錄講者仍將是口所問答參悟有合于道者畧爲綴紀成篇以存其說

一置遷善改過簿各一册會中有言行善者所知之人公舉于會衆覈果實卽書于簿以爲衆勸有過者各私相規正不必糾舉不悛則會長監會公舉入改過簿以

明倫先生文集 卷之二十一  
爲衆戒如果改行有一善卽銷其過總之欲人改行故簿不言紀過而言改過有過自首者免書如一連三過每會出班規戒有善則止

一人孰無過有過能改便見好學所以自古聖賢皆未嘗無過只是能改便是聖賢不改便是俗人聖賢俗人中間更無安脚處如郭梅山半生不檢一旦改過從孟先生講學至今人稱其賢何足爲人累哉所以會長監會須要放下冷臉提起熱腸共勉爲善有善必引有過必規不聽必再三再三而不聽當於會日公舉書簿若更飾非拒諫則亦末如之何矣如未嘗規而曰此人不

可規是亦吾輩之過也于彼乎何尤

一君子與人爲善原不計較平昔若素行不檢一旦改行從善更是難能但旣要入會須照約行若不照約行何必入會今後有願入會者先告會長監會卽取會約並存古約言士大戒各一册付本人前後細看便問君要入會是何意思其人必有以置對矣本人更須心內自忖我今入會果照約行否果始終實實行否或有夾雜意思否或暗借以行私否或口是心非面從背違否或因官府計較借此解免否或借個題目以後好出入衙門壓量人否果是實意無夾雜意便須當下立個

志一心做好人另置立志簿一扇凡入會者各隨本人趨向書爲一款以券將來

一立會原以立身修德爲主因以正人心善風俗非徒博名而已倘大家立志循禮守法敦行証性淺之完庸行之常精之透性命之原大之樹叅贊之業皆是吾輩本分事大成大小成小彼此成個好人便是學孔子便是學孟先生學孔子之事若猶未也名爲義而借以圖利名爲善而因以濟惡諸不檢狀一毫未改而徒以騰口說驚愚蒙或面相譽而背卽毀之或互相譏訕全無平心虛心意思或作輟不常或一朝訂盟而見勢利則

便背其所約或只圖責人絕不反己甚者所爲皆非致爲上官所責而謾之曰我與某某作會及或立心陰險毀人之善人心憤之鬼神瞰其室可不畏哉吾輩雖未必有此然當以爲戒方有實益

一會中雖是嚴肅務使情意藹然彼此相成相愛如古人同德一心斷金如蘭之意乃所謂君子同道爲朋雖自與小人同惡不侔然君子情誼比小人更篤若視如秦越過不相規德不相勉美不相成無貴於會爲矣卽拈經質疑亦只共明此心共見此性平心和氣自有定論不可有一毫求勝之心有求勝心便非學問

一世之誚講學者多云彼雖好人然其所與共講者則某某皆小人而彼群而聚之矣愚嘗疑之不講則已講則必有難拒者子夏拒之一字遂爲子張所譏拒誠非理然毋友不如已非孔子之言乎又何以訓也大抵自成德言固當擴胞與之度自初學言尤當慎匪人之比尊賢容衆數語乃君子成德後事初學者如何可爲口實畢竟子張好高故曰堂堂乎張也難與並爲仁矣然而拒之可乎曰亦非也孔子固云汎愛衆而親仁此取友之家法也馮先生亦云交與一人不可妄講學無人不可容愚甚疑之然細思先生意謂吾擁臯比而登壇

洗心聽法何人不可此卽所謂君子成德後事也然交與不妄雖成德猶然况吾輩此會原彼此取益自與馮先生成德後登壇開講不同故不可不慎若苟洗心改行孜孜于學所謂講學無人不可容豈過哉愚嘗云大凡其人易合者必終離者也其事易成者必中敗者也蓋亦夙有疑于講學家之易與而云然者敬質之海內君子以爲是

否  
一農商市民無不可與作善但其來會者未必實也或曰子何以其實爲哉彼雖未實而借此以引之向學者必多且三代而下士惟恐不好名耳何必實哉噫苟不

實而驚其名不惟彼此無益并會亦將中廢故農商市民非實有是志寧徐俟之或曰人有向學之心而棄之不隘乎曰此政急爲汲引卽所謂不屑之教誨者苟其力行好修則彼邵堯夫王之齋諸先生非布衣乎無已則有鄉約一法最便於布衣之向學者擬每月十五日群農商市民之有志者爲鄉約會以講

聖諭爲主而間及于先賢語錄明白易曉者其會簿儀節各項俱照常會稍爲斟酌合宜或與官府共議舉之務期實實照約行擇其雅志好修者公舉表揚之以勵末俗是亦君子汲汲與人爲善之心其誰曰不然

一春秋丁祭日凌晨各衣冠詣書院向孔子位四拜仍備牲果庶品致祭文昌及七先生祠其祭以冠帶一人主祭餘助祭禮生卽於後進內派禮生事畢補四拜祭畢或同享或散胙其備辦諸事會長會副監會豫爲料理毋致潦草失悞

一會中如有進身照孟先生約各出分金若干及願捐分金等項另立司庾一人會同會長收執查筭以備修理書院置買祭田書籍等項公用其同會中及他人貧不舉火或不能喪葬完娶者公議施濟登答明白  
一古人耻獨爲君子千里而一士猶比肩也道學久廢

功利溺人苟用心於是卽謂之同志卽謂之共學何必  
娓娓一堂哉凡遠方士人有志此學不能負笈只就本  
鄉將會約存古約言士夫戒一曰實體諸身與同心向  
學之人照約立會俾處處知學人人知學豈非斯道倡  
明之會嗟乎此生易盡至道難聞碌碌一生草木同朽  
徒令鄉先哲如程邵尤孟諸君子專美於前豈不可惜  
之甚夫誰無此心誰不能學而卒其淪落者亦由無人  
提醒安於自棄所謂豈不可惜之甚噫誠可惜也富貴  
功名轉眼一空如不可求從吾所好願吾同志者相與  
猛力振起焉

芝泉會約二

夫子論弟子首孝弟次謹信親愛終之曰行有餘力則  
以學文文何嘗有妨於行哉正爲行之資行之証行之  
寔地下手處文之會友以輔仁也修辭立其誠以居業  
也今人只見學文爲科第筌蹄全不檢點躬行所以先  
正嘗言今人自讀上大人便差了也若果寔寔躬行寔  
寔印証卽夫子所謂修德修此講學講此徒義改不善  
亦徒此改此卽雲浦先生亦只如此夫子而在亦或不  
免如此何差之有哉故有書義會以叅理解有文會以  
課制義而總歸于透性靈驗學問勿二三之雜勿作輟

之間勿外馳而游勿中堅而距勿浮而欺偽而譽囂而  
詬文之輔仁誠之居業蒙養聖功此其嚆矢耶其作聖  
也其階科第也守而無失任取益焉

計開

一書義會以每月初二十七日是日辰刻至會所向神  
一揖一躬候齊詣堂分班圓揖應告坐者出位另告餘  
人不必互告坐定司磬擊五聲命人供案將四書書程  
展開掣籤傳講每講畢卽各隨所証悟畧爲發揮問難  
仍將經鑑及半月內所讀書程畧爲考課以驗勤惰或  
更証悟道理規勉德行吟詠詩歌俱要嚴肅端正如聖

賢在上師保相臨不可大聲嬉笑往來無定及非理戲  
謔午刻傳茶餅事竣擊磬七聲起向神一揖一躬同至  
露臺圓二揖退其行立坐次俱畧同常會儀

一文會以初三十八日寅刻至會所候題至靜坐沉思  
不宜喧譁聚談彼此易位及更往別所違者會長監會  
規正不聽者罰再不聽則紀過每會以二三篇爲率或  
間會七篇及二三場每季一試第其文之高下勸懲有  
差

一每會看四書若干葉本經通鑑若干葉孝經孟先生  
要語各一二條另有書程

一凡看書須要將白文熟念二三遍掩卷沉思自有得處若於書肯契悟卽不必更看主意若主意有透語一見豁然卽不必又多看龐雜主意致亂心靈若被新舊諸說眩惑及屢看不解者另錄一手摺候師友問証不可草草放過

一掣籤講書先將大意說透卽就書中緊關處節節點破不專訓詁若主意有二三之說須此時當下參証明白取其一說大抵以紫陽註爲主不必紛紛兩可漫無定論若不能講或全未看者罰

一會日參証書旨各出所見歸於至當另立錄講生三人畧爲籍紀次日送閱以備參考

一每日所讀書不可專尚時文須將經史古文擇取熟讀其中字眼句法有不能曉然者不可囫圇吞棗須爲一小摺專書疑字疑句或就事體貼或設難辨折或因此悟彼或偶有所見俱書于摺候師友質問此法最爲得力如樊遲問知子曰知人不悟又曰舉直錯諸枉云云又不悟仍見子夏問須子夏說到舜湯選舉處渠心方悟借使不悟安知不又見師友問耶古人好學大端如此

一作文須細心思題意若何再看章義若何更想此題



格調大段若何如蓋房屋根基已定規架已熟我心先有成屋而後下筆須要會意題中遊神題外得力題前運思題後一心作去不管他人閑話閑行大率涵養到時不費苦索自然機趣活潑若取之左右逢其原萬不可抄錄陳腐時文卽有偶記亦不必全錄句句字字皆從心得方成名筆雖一時未必如此亦要從此造去若幼學心尚在通塞之間更須審量下筆不可潦草了事亦須薄暮通完若潦草或至晚不完者罰

一字隨工拙皆須端楷每于誦讀之暇卽取晉帖佳者加意臨摹務精心向裏自有進處先儒云寫字用敬卽

此是學

一每會執會一人多則分執如初二日用茶餅果之數初三日具辰午二飯不用酒肉其不能麪食者雖二飯皆菜羹脫粟亦無不可凡初二日會俱以初三日執會者爲之過侈及用酒肉者罰十七十八日俱照此行一每值會日執會預至會所編定卓號及安排卓橙筆硯茶火之類拂拭神位上香及查理名籤俱宜預定不宜周章失悞

一公舉會長一人監會一二人凡會中領袖糾舉俱責成之

一置從善改過簿與大會同遇有善過公舉書簿以爲勸戒如有一善卽削其過二連三過每會出班公責之有善則止

一每會照約時刻卽至遲者罰有事預告者免每月四會甚簡不必告假如有不得已事告于監會斟酌可否如不給假及通同濫許各罰凡許假卽與執會錄會說知錄會仍將簿內填到不到及假字

一會文閱後以地之遠近相傳人一日數人同地者共一日別有定則不可錯悞書義會日不論傳至何人卽帶至會所同閱閱畢付一人總收候年終擇其佳義選

刻

一凡轉文到日卽將自己與他人文字細看圈點因何圈點塗抹因何塗抹務要開眼體認虛心挹取不可一看便了嘗見不用心於內者連自己文字改批點抹全不照管或自以爲是謂人莫予若也閱文者枉費一番精神何益哉今擬數月後偶拈他人文字佳句或塗句一問如不能對卽是未看嚴數之仍紀過

一同會者年有長幼進有先後學有淺深幼學須于先輩長者之前恭而有禮不宜輒相輕傲以失厚道若會中偶有一言小嫌便卽銷化或衆爲婉解無成宿怨若

聞一人有不檢事共相規正不可坐視不規陷人於過更見相成之雅

一遠方學者有意斯文俱照此約立會各相切磋即為同德一心之友不必覲面一堂然後為同會也然理學舉業本非兩事善乎馮少墟先生之言曰國朝以四書五經取士雖曰為科第階倒是驅人於理學路上如今若講佛經道經倒難曉只講四書五經誰不曉得今之為理學真是容易何人之輕放過乎

一近日文會益多以格致誠正修齊治平字各為社便於分執每社即以執會者直日仍總責之監會

明德先生文集目錄

卷之二十二

會約

豐芭約會 會則

豐芭學約

伊洛會約一

伊洛會約二

明德先生文集卷之二十二

牌行應天約豐芭會

爲查取學行生儒立會作養以興起文運事照得周禮  
司徒實掌邦教以佐王安擾邦國而本部院奉

勅與督撫一體行事則地方人文教化與有責任况南  
都爲豐芭重地名賢輩出後來之彥豈可不加意作養  
邇聞士風日澆學業多曠本部院夙切軫念意在甄陶  
顧會計委瑣從頭做起日無暇晷今已料理一年有半  
化行民足而後可加意造士也然或舉之不實行之不  
力則嘉禾或叅以稂莠有初每墮於鮮終將作養之道

明倫彙編 家範典 卷之二十二  
未盡而菁莪之化或虛不得不慎重於始耳爲此牌仰  
應天府江防廳官吏卽轉行該學查取有學有行生員  
務要青年有志屢優有據或潛修力學不求聞達者多  
不過二三百名或有孝廉貢監素嫻學業願入會者一  
併開具履歷學行仍查該學有何官可爲師模可以批  
評文藝督率造就取二員督理并查何處公所堪以設  
會俱限二月初二日造冊具報以憑作養施行毋得潦  
草致孤本部院興起文運之意

豐芭會則

周禮司徒掌建邦之五典以佐王擾邦國訓萬民而其

要曰因五物施十有二教至其本俗之四若五則曰聯  
師儒聯朋友今本部院之與爾多士上下其議讐較其  
旨月有會歲有程考課有抑揚鑒識亦旣竭蹶事此矣  
雖然枝附葉從表立影隨不模不範初炳久渝蓋聞損  
之者如燈火之消脂益之者如苗禾之播殖然而必金  
之在鎔百煉不渝久久垢隨火去真金自在易曰忠信  
所以進德也修詞立其誠所以居業也今與爾多士所  
互相訂証者非進德居業事耶夫嶮道之夷磴闢室之  
燧鉦度疾之仙丸出谷之神馭豈在遠乎若曰姑以爲  
名而弗軌于則隳括之旁多枉木砥礪之門多頑鈍是

明倫先生文集卷之二十二  
將信然乎哉爾多士庶勿負茲苦心本部院將拭觀爾  
多士三物賓興五禮防僞咏先王之風而雲蒸霞蔚爭  
先嘯起彬彬然矣本部院實典邦教庶不重曠厥職實  
惟爾多士之詒

計開

一擇學博二員督會而以江防官總之上江二縣官典  
提調該縣捕官供巡緝諸生中擇老成端謹有學識爲  
衆允服者立會長二人仍分爲明德新民格物致知誠  
意正心修齊治平戒懼慎獨中和位育等社社各四十  
人以學行有識者每社二人爲會副司糾正紀錄

一講書日辰刻官師諸生於祠前候本部院肅臨一躬  
禮生導謁明道先生官生隨班行四拜禮畢升堂官生  
以次見如常儀應坐官照憲綱序坐諸生於簷下分東  
西班站立鳴講鼓供講案隨掣籤唱名本生應聲出班  
西向立挨序進講至簷上案前一揖照書程命講須高  
聲剖晰章旨洞徹貫串勿煩涉訓詰講畢一躬下階東  
向立俟各生講完諸生不妨互相問難讐証各出所見  
以定宗旨蓋此番講書期於實証實修不得視爲平常  
臨學套講故事

一書程照刊定大學中庸論語孟子孝經史鑑每月各

數十葉講書作文俱以此為率約一年內外可一周講書完各本生將所講略節并本社會副將本日問難語錄略節記其大義俱於三日內送該學總呈閱定發刊一諸生看書須將通章白文默誦潛思務要句句字字體貼在自已身上必實實可証自已實實可見諸行事方為明透或與同志二三友人探討磨勘必使豁然有得不宜囫圇吞棗勦襲釘釘如有疑義及有獨見真解俱不妨列款于會日質訂

一會文日五鼓在會諸生各儒巾便服持筆硯墨注齊集門外候本部院案臨提調督會等官先入見畢諸生

立大門外聽督會官點名魚貫序進至公座前點名給卷掣籤認號就坐坐定盡逐閑雜出門執事吏領鎖捕官封大門等門仍嚴行巡緝大門內外不得容留一人候出題吏執牌傳看諸生靜坐不得起立諠譁如發題委考亦照例封鎖嚴甚有加

一會文日須極早齊至不得參差前後出題後尤當沉思靜會不得喧哦移換其坐號即自書卷面出恭擊雲板一聲回擊二聲飲茶擊柳二聲日或二義或三義以日晷修短為率更出表論策賦辨解詩歌等題以觀所養是日俱不給燭即自帶燭亦不給燃總以日落為率

是日俱當如約故違者督會官紀姓名下考不得與會  
一卷完時督會官飭書吏受卷每二十卷爲一封完二  
十人取匙開門放出放完仍閉捕官驅逐閒雜不許縱  
容一人擅進如違重究

一會卷評閱等第發學折號出榜傳示諸生赴學領閱  
限五日內繳院其一等卷仍令刪潤謄寫如式序次選  
刊二等卷有願刪潤者聽

一會不必廣收亦不厭廣收期於實收會文輔仁之益  
如有敗類及借會爲名以市重者督會官不得濫收今  
後如有苦學尚志之友不妨考核精確續申候示不得

徑自收入既入會後卽當以有恒自勗有緊要事或偶  
疾在督會處預假不得倏去倏來有初鮮終一次不假  
督會誠諭二次不假卽申呈下會免給試卷

一在會諸生務要情意藹然旣敬且和互以躬行相砥  
躬行端本于心術正心術正則我之心直如朱絲繩清  
如玉壺冰剛大浩然塞乎天地立志要願爲真聖賢不  
但願爲名科第名公卿不然心術一壞百行皆非文雖  
工猶之乎霧縠組麗爲女紅之蠹也

一諸生以作文講書爲業若有尚論古先訂証素行何  
妨就正但是日不談時事不談公事不許借口公論糾



明倫先生文集 卷之二十二  
三  
衆出議會長會副亦當爲鳴鼓之攻

一本部院以興文運育英才爲已任跡雖疑於越俎心實篤乎緇衣然何能爲諸生益惟願諸生有以匡我之不逮一堂斷斷起予良多豈非本部院之受諸生益更奢卽至一切供具飲食俱要精潔堪用不得草惡取厭其費用俱本部院捐俸節省不費正額一錢亦不取用民間一物所司官吏不得借名糜冒亦不許分毫累民其各體此意無斃

### 豐芭學約

人生樂事聲色玩好過眼皆空且或反結苦趣我輩要尋真正受用安在夫爾諸士屹屹終身非學也乎哉然而所學何物所爲學者何事不過曰取科第做好官多得錢此從總角舞勺時念頭便差南針一錯九澤都迷爾諸士試問從前魁名大物若而人台鼎若而人顯名厚實若而人其精神結聚憧憧徵逐今安在哉楊子曰或問治已曰治已以仲尼或曰若是仲尼奚寡歟曰率馬以驥不亦可乎故曰晞驥之馬亦驥之乘也晞顏之人亦顏之徒也然則爾諸士奚志乎哉孝德之本也孝弟不敦雖有他善猶玉屑盈車不可琢爲圭璋李成季謂其猶子曰爾文吾不能有所與但勿求人知耳澹泊

寧靜四字可爲良藥龍之潛也確乎其不可拔鄙夫鄙婦相會廝陰明日或揚其言焉士篤潛行胡爲乎其術而售也昔人稱華榮之言終爲愆石有玉傷其山而且競鞏悅之麗蕩食色之性而且喙長腰折以公庭爲市無惑乎世俗之日偷而士自賤也夫士也埋頭書案以經史爲味以躬行爲服以道德仁義爲倦卧渴飲而以博反約以意逆志直與千古聖賢夢寐晤對視彼舍元龜甘朶願者所得孰奢至于理鬱者苦貧辭溺者傷亂文章一道士趨日雜非駢枝朒贅則楮葉霧縠鼓怒浪於平流震驚颯於靜樹雖有才士若燕之行而南其馬

馬逾疾而去燕逾遠復申之曰行衰於寡助友傷于比匪芝室鮑市浸淫俱化故交不可不慎也爾諸士誦法孔顏當潛心篤學等爾真正受用安在必有默默可思者與今若冬涉川猶今若畏四隣夜光結綠不作鬻市之珍逸羽翔鱗豈甘園池之玩熱鬧中別具冷眼澹靜處獨有熱腸夫亦愈知學矣是故學也者以言乎其覺也極西之南有眠人眠五十日始一覺以夢爲真覺爲妄夢覺之關特爲爾諸士拈破如味飴蜜滿口皆甜味予之言有甚於是

定志嚮

士有無前事業而一氣可以直奏之者無他其志先定也直根之樹無曲影振翮之鶴無卑棲雌伏雄飛耻掌名姓之記乾旋坤轉豈存温飽之圖屹屹三軍撼之不動閒閒十畝不求有餘諸君子將通天下之志可不正彼天植乎故約首定志嚮

### 敦孝弟

求忠臣於孝子通長幼於大倫從至性立崇高百行基於不薄以太和爲保合萬物周於未孩有生欲報在三真品斯爲第一清華滿座萬石君之子孫羔雁成群陳元方之兄弟益孩提稍長之成性匪宗族鄉黨之博稱

謹庠序申孝弟夫亦敦本是務焉

### 甘恬靜

周士貴秦士賤夫非以吾鼎可愛人熱空因與楊子雲家產不過十金閉戶著書曾拒萬錢於富姓孟浩然到京不遠千里故交把酒安知舉薦之韓公命不關天妄意讀書談道之外士固有品豈在利門名路之中故以甘恬靜爲諸君子勗

### 勵潛修

若夫蓬塞衡門蘭生空谷杳然天地紀省之養木鷄展也風雲園客之絲獨繭古人見我汗下通身散聖安禪

風光本地先儒云士人獨行明不畏王公幽不畏鬼神  
卓哉斯言則各有爾潛修者在天賦與性之養本體

### 慎言論

頡頏今古正借機鋒體撰神明尤資麈尾但洩無餘蘊  
天地之美不鍾况逞有畔經聖賢之徒安在須慎之又  
慎師寡於吉人言以不言歸功於靜正公命不關天  
禁奢靡  
天地之寶惜之自士人先朝野之風轉之自吾輩始奢  
則示儉儉則示禮二簋可享何必費中人之產以佐庖  
魚三澣可衣何必逞竭澤之漁以供裘馬胸藏萬卷堪

羞碎擊珊瑚學富五車自爾隨風珠玉欲敦白賁用禁  
綺靡

### 簡遊宴

董仲舒下帷發憤足跡未嘗窺園魏伯起隨樹讀書牀  
板爲之鏡減若登山臨水旬日忘歸則寸晷分陰一生  
虛度且以遊而角聲伎用燕而喪威儀要識曾點之暮  
春姑置向平之名嶽

### 省訟謂

鳳翔千仞豈聆角雀之聲龍蟄九淵孰等陽鱗之味故  
鄒陽之書雖躁不如遠獄忘言彌衡之刺不投爭似養

高屏迹故是非問幽獨莫問公庭聲價求可賓非關折節

勤實學

學以經世為大兵農禮樂總是心精理以適用為真齊治均平功先格致若夫口耳說鈴步趨拾潘觀秋水之暴至罔識津涯掇朝華於已披豈尋根據欲內不負所學外不負所知不亦難乎故勤實學要務也

精書理

詩書之理如帝臺之漿可愈心疾靈犀之角可影鷄鳴但粗則三足之鷄精則萬川之月盤旋註脚縛呆漢於

焉 千年抖搜精神碎疑團於一刻吾願精書諸君子自至

正文體

文者心之聲也心術正則文體正文體正則世運正提衡者所必慎也昌黎起八代之衰力崇正始廬陵恥七子之陋體尚雍容識尊則采自異何須牛鬼蛇神學到則理自深何用拈花擊竹修本成形隨便立功氣備中和言能壽國予於諸文士有厚望焉

親良友

夫比匪之傷不利於君子麗澤之兌有功於出門人之

無良我以為友是敗群也其必匡德補過蓬門始為君  
開無然讒諂面諛禮法非關我設請觀翟公之書貴賤  
永佩孝標之廣絕交

伊洛會約

與芝泉會約畧同

往予為魯司理則群魯諸生為會會有約為吏部山居  
則群新人士為會會有約為南廬南樞則群豐芭都人  
士為會會有約今伊雜人士從予游三年矣會有約約  
久之而人士彬彬興起矣雖然諸友之向上理會者文  
質兼進而其半似以予為帖括拈宗法也已矣夫修詞  
立誠固居業事然學者之所以立身行道繼往開來調

元贊化正人心扶綱常弼名教式風俗豈徒然哉蓋亦  
反其本矣

一定志趨學者先須辨志試思今日此會為何可止曰  
為制舉業已乎以梯科第青紫之榮已乎以博名已乎  
夫吾輩之所以為天下後世重者豈徒以文哉即予之  
所以期願諸友者豈徒以文哉是不可不反求之也若  
知去華務實研究理學即不作文會即不科第青紫亦  
不失為德行之士不然霧縠文章泡影功名將焉用之  
一議會期每季以孟月二日為大會以每月十六日為  
恒會蓋以會之日證驗其會前之日所得學問何如耳

非徒憧憧往來朋從爾思已也必敬而有恒極其真誠  
嚴肅勿謔勿詆勿譽勿閒談勿襲取勿作輟  
一重大會是日夙興各謁先人祠省問父母畢卽趨會  
所別憇已刻齊集公服升堂序立恭拜  
至聖孔子四拜拜畢司講者恭誦孝經一章一躬退復  
位序立向本堂四拜拜畢分班對拜拜畢向本堂一揖  
一躬告坐仍總一揖告坐有應單告者仍單告然後就  
坐坐後有續至者向孔子位一揖一躬向本堂一揖一  
躬兩旁一拱卽就坐講竣起一揖一躬後至未揖應補  
者補之仍分班對揖露臺下一躬退如本堂先行則送

至門外一躬退

一肅恒會是日亦夙興謁祠定省畢趨會所別憇已刻  
便服齊集升堂向本堂一揖一躬分班一揖仍序立向  
本堂一揖一躬告坐仍總告單告如前儀就位掣三籤  
命書肅講講畢互相質論竣則一揖一躬其後至補揖  
分班揖退俱如大會儀  
一酌儀節凡初立大會及孟月二日拜  
孔子及本堂四拜仍各對二拜餘會俱不必拜至於會  
中先期不約臨期不速往來不迎不送或達官遠客在  
坐必斟酌禮節期於上交不諂下交不瀆毋過讓不決

其告坐惟祖父及伯叔父兄外祖舅岳師單告其餘卽有應告者俱在總告中不必紛紛單告  
一程月課此會以闡發孝經爲主其易經家禮性理小學及所業經書史鑑或程朱先儒語錄等書每月書程各有定約精心研究實體諸身求合於理毋故悖程朱相尚以詭異之說倘有能發明前賢未發足以羽翼經傳者隨時書摺會則相質每月各書一二條以觀學問之益  
一戒浮談凡會中語以經書爲要以人倫日用爲本以經世實用爲務以闡經翼聖爲宗不得談朝廷之得失

官府之詞訟田宅之美惡他人之品題與夫一切鄙褻險怪之說違者會長會正監會正色立止之不聽者紀

過

一提綱領是會統於明德堂公推會長一人會正二三人以總其事仍以格物致知誠意正心修身齊家等字分爲會每會推會正一人監會一二人司其會之評閱錄講糾舉諸務蓋會長論年會正監會不專論年必其人學問可以闡道躬行可以式俗直諒可以服衆此數人者亦不可叅一毫私意致衆不服其坐次宜稍前以便訂証拜位亦以此爲定



一 整會務每會輪派二人執會供具茶果如人多卽三  
四人亦可總於本堂捐備公費內開銷貧而無僕從者  
免執務要豫至會所整飭神位卓橙水火筆硯籤筒之  
類必使肅然犁然如執會有事豫告另派不得周章悞  
事

一 驗勤怠置會簿一首會長次會正次監會次會衆姓  
名仍各書字號年齒下爲格填到不到及假字以驗勤  
惰蓋會期旣簡卽有他事亦宜一切放下如萬不得已  
仍將姓名事體書一小帖告於會長會正前一日送堂  
不假者一次罰二次罰仍紀過三次會簿不列名

一 重閭修會中不言公事有官府則宜更嚴對人不傳  
名色入衙門則當倍慎若以會所爲講事之地講學作  
護身之符其人可知矣願諸友共戒之違者紀過

一 稽善過會中置遷善改過簿一册凡有言行善者所  
知之人公舉於會覈實書簿以爲衆勸善積則公舉於  
官有過者各私相規正不必糾舉不悛則公舉入改過  
簿以爲衆戒如果改行有一善卽銷其過總之欲人改  
行故簿不言紀過而言改過有過自首者免書如一連  
三過每會出班規戒有善則止

一 勸改過人孰無過有過能改益見好學所以自古聖

賢皆未嘗無過只是能改便是聖賢不改便是庸愚聖賢庸愚中間更無安脚處如新安有郭梅山者半生不檢一旦改過從孟雲浦先生講學至今人稱其賢過何足爲人累哉所以會長會正監會須要放下冷臉提起熱腸共勉爲善有善必引有過必規不聽必再三再三而不聽當積誠以感動之若更飾非拒諫則亦未如之何矣如未嘗規而漫曰此人不可規是亦吾輩之過也

一慎始入君子與人爲善原不計較往昔若素行不檢一旦改行從善更是難能但既要入會須炤約行若不炤約行何必入會今後願入會者先告會長會正卽取

會約并孝經家禮存古篇士大戒各書付本人前後細看便問君要入會是何意思其人必有以置對矣本人須心內自忖我今入會果照約行否果始終實實行否或有夾雜意思否或暗借以行私否或口是心非面從背違否或作輟不恒見勢利則趨否或因官府計較借此解免否或借此題目以後好出入衙門否果是實意無夾雜意便須當下立定志向各隨本心作定志說

一通并歷履以參將來

一篤真和會中須是嚴肅務要情意藹然彼此相成相愛如古人同德一心斷金如蘭之意乃所謂君子同道

爲朋若視如秦越過不相規德不相勉美不相成無貴  
於會爲矣卽拈經質疑亦只共明此心共見此性平心  
和氣自有定論不可有一毫求勝之心有求勝心便非  
學問

一堅識力自古及今惟有理學一道存幾希于人心亘  
萬古而不毀然而開眼認識出頭承當何寥寥也只爲  
俗情牽絆不暇及此或從事於文詞不能爲此或爲不  
利仕途不肯爲此不然則畏俗人之譏議之也畏俗人  
之非笑之也不敢爲此予謂士人全要識力無識力者  
必不能講學又聞馮少墟云正要立講學名色使天下

後世人人知學成就方多成就方大若只閉門成就我  
一人恐道脉自我絕矣且畏人之譏議非笑講學也與  
喜人之稱揚講學也病則一般諸友今日不可不闔眼  
認識出頭承當

一省交際在會諸友貧富不同苟非科第大慶及父母  
大故其彼此一切禮儀俱可省不必紛紛歛分俾貧而  
不能爲禮者有自外之嫌如別有親誼不容已者聽然  
凡一切禮儀晏會俱宜從儉從質以存古道另有約  
一置會費凡會中茶果器用之類所費不貲而諸友會  
文飲饌貧士猶有難色本堂每心欲代之此後來學日

明德先生文集 卷之二十二  
衆春秋伏臘宜置祭田又宜集經史書籍俾有其舉之  
弗敢廢也或遠方之士來學者亦宜量助升斗以資誦  
讀皆不容已者也但願捐分金者甚少而進身輸金者  
亦尚需時日今本堂先捐借銀五十兩以爲諸友倡仍  
酌議買田以爲長久之計議舉司會二三人主其事每  
季截筭年終通筭登荅明白其後來進身輸金俱照例  
收支總筭

一廣興學古人耻獨爲君子千里而一士猶比肩也理  
學以廢功利溺人苟用心于是卽謂之同志卽謂之共  
學何必娓娓一堂哉凡遠方士人有志此學不能負笈

只就本鄉將孝經會約家禮存古篇士大戒等書一一  
實體諸身與同心向學之人照約立會俾處處知學豈  
非斯道倡明之會嗟乎此生易盡至道難聞碌碌一生  
草木同朽徒令鄉先哲如二程康節温公月川西川雲  
浦諸先生專美於前而孔子幾爲不可學而至之聖人  
豈不可惜夫誰無此心誰不能學而卒甘淪落者亦由  
無人提醒安於自棄所謂豈不可惜噫誠甚可惜也富  
貴功名轉眼一空如不可求從吾所好願同志者相與  
猛力振起焉

伊洛社約二

孔子論弟子首孝弟次謹信親愛終之曰行有餘力則以學文文何嘗有妨于行正爲行之資行之証行之實地用力處是故文之會友以輔仁也修詞立其誠以居業也今人只見學文爲科第筌蹄全不簡點躬行所以先正嘗言今人自讀上大人便差了也若果實實躬行實實印証卽孔子所謂修德修此講學講此徒義改不善亦從此改此卽程邵諸先生在亦只如此卽孔子而在亦或不免如此何差之有故文會雖以課制義而總歸于透性靈驗學問勿二三雜勿作輟間勿外馳而游勿中堅而距勿浮而欺僞而譽囂而詬文輔仁誠居業

蒙以養正聖功也文與行豈有二乎

一定會期每季以孟月三日爲季試蓋以課其學問之殿最云爾或三義或五義或間出論表策判詩歌說辨其文以一二三等衡之每月以十七日爲月會以二義爲率或三之或間出後場其餘逢七願另在外照約聯會者聽

一肅課規是日寅刻畢至候齊升堂一躬一揖衆對一揖稍退逐名給籤照號入坐是日沉思靜坐不得易位聚談吟哦笑謔減篇少結不得減筆差訛塗註遺落俟完會正執會查有無違式印註罰懲

一精文思凡作文坐定候題至須細心思題意若何再看章意若何更想此題大段格調若何如蓋房屋根基已定規架已熟我心先有成屋然後下筆須要會意題中游神題外得力題前運思題後一心作去不管他人閒話閒行大率涵養到時不費苦索自然機趣活潑若取之左右逢其源萬不可抄錄陳腐時文卽有偶記亦不必全錄字字句句皆從心得方成名筆雖一時未必如此亦須從此做去若幼學尚在通塞之間更須審量下筆不可潦草了事俱限薄暮通完不給燭

一析書理凡作文未精純者皆由學問之功未至也今諸友所讀經書史鑑及古文詞須要熟讀詳解如講書先要看白文理會然後取名賢語錄主意質証不可專看學究講章詭異主意亦不可專尚濫惡時文如有疑難須要因心析理或就事體貼或設難辨折或因此悟彼偶有見卽書一小摺質于師友此法最爲得力如樊遲問知子曰知人不悟又曰舉直錯諸枉能使枉者直又不悟仍見子夏問必須子夏說到舜湯選舉化不仁處方悟借使不悟安知不又見師友問耶古人之好學大抵如此

一敬字學習字無論工拙皆須端楷每於誦讀之暇卽

取晉帖佳者加意臨摹務精心向理自有進處先儒云  
寫字用敬卽此是學

一實批閱本日薄暮執會彙集送堂輪派會正監會二  
人遞閱各以墨靛色別之務從實批抹不得扶同標榜  
亦不得面是背非傳洩生隙人各二日送堂堂閱完發  
會長傳閱人各一日不得過期悞事俟下次講會公閱  
完卽彙繳選刊如季試仍列等第以示激勸

一戒自滿書曰謙受益滿招損學問之道以虛受爲益  
務要若無若虛慮以下人卽如轉文一節務要看自己  
與他人文字圈點因何圈點塗抹因何塗抹務要開眼

體認虛心挹取不可一看便了嘗見不用心於內者連  
自己文字批改點抹全不照管或自以爲是謂人莫知  
也閱文者枉費一番精神何益今擬數月後偶拈自己  
他人文字佳句或塗抹句一問如不能對卽是未看嚴  
數之仍紀過

一備刊布每會文有可刊者卽自行刪改潤色送會長  
彙送堂閱其季試一等者亦如之每季卽行料理積久  
成帙發南京刊行如豐芭社刊鍾雨篇例

一派執會凡會俱預派執會二三人預置卓橙仍編字  
號並安置公座籤簿筆硯輪備辰午二飯務從儉朴大

約四人一卓卓四器早用脫粟飯午用麩食粳飯通不用酒肉晚不再飯亦不備盒酒其備飯卽於輪備銀內酌議開銷但有事給假及至會者須預告執會明白毋致倉皇失措

一議責成近日文會益多議以率性修道戒慎恐懼中和位育等字各爲社每會事體總責之會長會正監會仍以執會者直日仍置文會姓氏簿註給假到不到及題目等第以備查考

一廣同志遠方學者如欲作文會而力不能負笈者照約立會各相切磋日求進益卽是同會不必覲面一堂然後爲同會也雖然理學舉業本非兩事善乎馮少墟先生之言曰國家以五經四書取士雖曰爲科第階梯正是驅人於理學路上予曰以舉業爲理學則理學愈明以理學爲舉業則舉業愈真是在學者之自認取之而已

### 罰例

一講會有事者預假免罰不假者罰紙十

一過已刻至者罰紙五喧笑不肅及閒談泛談者會長

監會糾舉罰紙十五

一掣講孝經四書五經家禮等書未看者罰紙二十歷



三月無一條質証者罰同

一文會日出至及易位聚談吟哦笑謔者各罰紙十少  
一篇者罰紙十少一結者罰紙五文內簡筆差訛塗註  
等字每篇三字以上每字罰紙一大勢潦草及題旨差  
字罰紙十用燭者罰紙十錄舊一二比罰紙五半篇以  
上者罰紙十誤事周章閱文違期及扶同標榜者罰亦  
如之

一文會有事以小帖告於會正執會給假仍照少篇例  
罰紙十如真有萬不得已事同會正執會具帖堂批准  
乃免不假者罰紙三十但或假或至俱預告執會以便

備飯如不告或遲告及執會失備悞事者罰紙四十用  
盒酒肉者罰紙同

以上罰紙以台連紙爲則或以二錢代一紙司會者  
司收支應糾舉者會正執會卽日註於簿仍五日內  
催完送司會收如過期不送卽倍罰倍罰而不應則  
三倍之仍紀過會正執會不糾不註過五日司會不  
糾者卽以其罰罰之

明德先生文集目錄

卷之二十三

語錄

川上會語

芝泉會語

孝經軒語錄

慎獨堂語錄

寄弟書語

明德先生文集卷之二十三

川上會紀

先是海內以學爲諱無復言講學者余謂所惡於講學者爲其僞也乃併其真者而訾之乎豈因噎而廢食耶只不有其名可也馮少墟先生之言曰講學正要箇名色使天下後世人人知學成就方多若怕世人譏笑刪去名目只成就我一箇人恐道脉自我而任便自我而絕人只是恐人譏笑故恥其名不知不以不學爲恥而以學爲恥則可異矣且講而不行可恥孰甚講而行又何恥之有哉此其見大而言之親切有味余不及也

乙卯之役余會先生於關中書院所語如是余聞而身之矣至是先生被召爲御史大夫果以講學逐天下於是笑先生之不逢世而以學爲諱尤甚於昔乃有志之士則望先生若鳳凰芝草幾幸一見焉是日方夜篝燈團坐共質向日之所語於關中書院者而先生語益進諸生皆欲身先生者而心嗜先生語謂是日語多不能記且不暇記日向余問則余忘之矣諸生固問不已乃僅記憶其所問答語數端略爲綴述其忘者十之七然以語求先生則亦遠矣是日會者先生共余及先生之門人孫繩祖楊道興其子嘉年其孫湛若恂若而舍弟吉孺氏同諸生凡數十餘人邑長吏解君與焉是爲壬戌冬十有二月之七日微風披拂天寒欲雪

計會中問答語二十一條

先生曰或問孔子是生知安行聖人何故十五志學吾答以十五志學所以爲聖人我輩四五十尚不知學孔子十五便志於學所以是生知安行聖人又曰十五志學便志到不踰矩田地三十四十五十六十七總志是志學若志到不踰矩田地是志甚麼知吾自出京來便志到家了只是便走不到須一步一步走將去

又曰生知安行學知利行困知勉行總是要學只是學有難易如京師報馬到此只走三日便到豈是不曾經過涿州良鄉孟津雒陽特比他時走爲捷耳便是顧脚徒步亦只如此經過卽飛亦須從此經過四十五六又曰人多言不踰矩是我每如此便了惟聖人則從心所欲此言不是離却從心所欲使用檢點便有不到處便有踰時余曰我每亦是從心所欲不踰矩只欠純耳若不從心卽是皮膚上不踰便假了先生曰然

余曰何不言規而言矩曰此是聖人言外之意矩是方的人只從圓處做所以多錯可見學問宜從方處做

又曰人只看矩可以踰可以不踰孔子是聖人故不踰矩我不做聖人踰些也罷不知人之於矩猶魚之于水原自踰他不得且不踰則得踰之則失不踰則吉踰之則凶甚且不踰則生踰之則死至爲得失吉凶死生所繫而曰可以踰可以不踰乎余曰此言最儆省

少墟問曾與王惺所張抱初講何語余曰王言立志張言知恥然余以爲立志須先知恥如士志於道而恥惡衣惡食便不知恥知不恥不若人何若人有便是知恥少墟曰然恥獨爲君子便是大恥余曰獨爲君子自初學時無人夾持恐便有躲閃時候自成德言一夫不獲

時予之幸正是已之分量未曾圓滿此正恥之近裏着已處

少墟曰德之不修一節只是爲修德而發講學只講其如何修德也下面徙義改過是實地修德處又曰文公於德之不修註解曰四者日新之要初疑日新字于四者何于不知四者不日新則亦不成其爲德矣如今日徙義而明日不徙照舊是不徙今日改過而明日不改照舊是不改日新二字文公極費苦心

又曰學如梳洗穿衣吃飯昨日梳洗當不得今日梳洗今日梳洗當不得明日梳洗穿衣吃飯亦然余曰若昨日梳洗穿衣吃飯今日不梳洗不穿衣吃飯便蓬首垢面或寒而病飢而死者矣况終年不梳不洗不穿不吃者乎其生也幸耳煞可深畏

又曰善有在今日爲善明日卽非善者過有在今日爲過明日卽非過者此處最精微所以學全要日日講纔得不差

又曰孔子云學之不講是吾憂也不講何憂之有只不講便不修德不從善不改過此中便作無窮之非僻生無窮之隱禍不講不足憂也禍猶不足憂耶

又曰只爲躬行故不得不講余曰若旣講矣何故不躬

行  
又曰人不講便差了差亦不知所以要講

又曰學問在做官時越發該講事上接下案牘紛紜孰  
非講學使無學問便差了如中庸九經說到既稟稱事  
日省月試不如此則精神不周到便是學問有不貫徹  
處

余弟吉孺問不遷怒不貳過便是學抑其先有學乎少  
墟曰卽此是學余曰二不字正是好學離此安得另有  
學問人只看得這兩句粗所以謂上一層先有學問不  
知此是最細學問易曰有不善未嘗不知知之未嘗復

行所謂不遠復無祇悔安得粗視之少墟曰然易曰懲  
忿窒欲可以參看然只是不貳過便了怒是過中一節  
不遷怒最是難事

吉孺問性相近習相遠章少墟曰人性皆善而氣質有  
清濁純駁故曰相近只就善中相近又問明道言善固  
是性惡亦是性何也少墟曰惡亦是善中之惡亦在氣  
質上說先生顧余問余曰是但說惡畢竟落在氣質上  
性何嘗有惡畢竟相近只是善卽孟子所謂性善原無  
二理謂相近者特因下面有相遠字對而言之正謂其  
同非謂不同也文公註此所謂性亦兼氣質而言蓋因

相近字看出亦補語所不及之意非相近本肯少墟曰正是

又曰舉業理學原非二事以理學發出文字為真舉業以舉業證出道理為真理學且前朝多以詞賦雜流取士惟國朝以四書五經取士雖曰為科第階倒是驅人于理學路上如今若講佛經道經倒難曉只講四書五經誰不曉得今之為理學真是容易何人之輕放過乎余曰朋友之益最大初學尤宜慎交近漆者黑近朱者丹一定之理如人家子弟初時便不曉賭錢便不識青樓之門無人引誘決不至此試觀後來賭嫖不成材那

箇不因朋友引誘來少墟曰然

有問知其說者節謂還是治天下還是關係大少墟曰俱通得只謂仁孝誠敬便無難處之事余曰非也余幼讀書每書向自身及實事上體貼通者坐不通者半妄謂聖人之言半虛說也乃今細細體認覺其義日新無言不可體認到實事上如其說之於天下今只言禘是祭祀及禘所自出之祖等語與天下何相涉即言仁孝誠敬何以通之天下聖人之說不虛而罔實乎不知聖人原有深意言之於天下便知禘是有天下事魯當禘乎不當禘乎且魯僭用禘及凡此類甚多而大夫便



入侑便雍徹陪臣便執國命一國如此國國如此所以  
天下難處果能明此說便兜底一清魯不曾有天下自  
然不應用禘如此之類盡還之周天子大夫陪臣自然  
不敢僭亂天下有天子諸侯大夫陪臣各安其分而不  
治乎尚有何難處之事是夫子有反正之意非徒爲魯  
諱也如此體貼方有實據凡書必看到此地方見聖人  
言言實事非玄虛之談也又如明乎郊社之禮節有謂  
與此不同不知聖人之言豈有二理彼亦只是實事只  
將前面宗廟之禮一節作註解自明豈有親親賢賢序  
事序爵逮賤敬老而天下有不治乎與問禘之說節同  
作實事看便豁然少墟曰然

余又曰如致中和天地位焉萬物育焉新說多言吾心  
之天地位萬物育似精實粗似深實淺凡看書落此窠  
臼多矣蓋聖人無虛言實實有此理實實有此事然萬  
物育焉以親親仁民愛物之說通之人猶易曉惟天地  
位恰似荒唐說不知能致中和自然天清地寧如紂時  
山崩水竭宇宙黯慘光景至文武而一清足徵矣卽如  
寇賊變亂風霾愁慘天地爲昏誰非人爲所致豈不是  
天地不位之徵安得以爲非實事乎少墟曰正是人只  
以造化徵人事今當以人事徵造化

又曰今日與諸賢坐一時覺一時之天地位萬物育了  
余曰是但如此說人未必醒只言此中如有一夥匪人  
在此飲酒嚷鬧賭錢爭毆其光景便不位不育則此一  
時之爲位育可反而觀矣

芝泉書院會紀

天啓四年甲子春三月十有八日芝泉書院成吉水李  
侍御緝敬竣河東歸從先生者若張叅藩九劬朱僉臬  
午臺梁太守樹宇張別駕培元解大令調垣及愚維祺  
爾時遠近之士皆來學凡澠盧諸生至者及新安士數  
十輩緝敬停車一日爲作是會初至洗心堂登拜先師

遂禮七先生于西祠旣列坐一生進講若聖與仁則吾  
豈敢緝敬曰世只爲看得仁聖難了仁聖只是當下完  
全的爲也是他誨也是他見得這裏邊滋味便自歇手  
不得可謂云爾不知老之將至云爾皆見聖人之心惟  
日不足傍一生云此亦只是爲之不厭正惟弟子不能  
學不能學爲之不厭也緝敬曰這亦不必替他回護吾  
輩爲亦離不得誨日用事物卽是爲卽是誨又一生問  
曰聖人是生知安行是天生成的如何云不要看得難  
了緝敬曰說聖人是生成的便自暴自棄生猶不悟愚  
云只爲天生成三字誤了多少人愚嘗服張蓬玄司馬

有云千古無生成的聖人雖見地不同都由學問涵養  
來生云或生而知之非與愚曰正是錯認此句世間那  
有生下便知的大人者不失其赤子之心卽生知也且  
此生字要就道理看不就生死看觀經書中樂則生矣  
本立道生生之謂易皆是這箇生字恰是不假思議  
自然生出這箇知來有生生不已之義非天生的便知  
也不思而得卽生知註脚難道安行是天生的便行否  
其實或生而知之六句亦不死煞指定一箇人要看  
活緝敬曰極是此只論道理辟如孝道中問安視膳出  
于天性卽生知其中亦有學而後知者卽如幾諫是其

心愛父母似有生知的意思見志不從又敬不違似有  
學知的意思勞而不怨似有困知的意思生乃大悟又  
論上智上達語上形而上諸義愚云學問只有下學一  
路下學中自有上達非下學是一件物事上達又一件  
物事凡耳可得而聞目可得而見口可得而言身可得  
而持行者皆形而下也謂形而下形而上判然兩物便  
不是然謂形而下卽形而上亦非也蓋謂形而上卽在  
形而下之中也道理一句透便無不透是日緝敬與諸  
使君反覆辨論皆直剔撥到至處都無剩義諸生互起  
問答頗于言下有省已而諸生歌文成先生詩一闕四

明倫先生文集卷之二十三  
九  
座肅然始信靜極而動動極而靜靜中有動動中有靜  
無處不可體貼所司進茶餅三行酒乃過愚別業具一  
餐時牡丹翻堦木香拂檻曲水穿石鳥雀上下緝敬曰  
卽此是仁聖當下完全的卽此是形而上者諸君退會  
關中麻奉常立軒取道之留聞愚與緝敬會講於此忽  
長松濕雲處有趺然足音者則奉常披烟蘿而至也愚  
與緝敬喜甚乃盤礴洞壑促膝笑語緝敬曰茂叔每令  
二程先生尋孔子顏回樂處所樂何事吾兄可謂全具  
此樂愚曰吾只視此中略勝似長安拜客風沙侵面耳  
奉常曰嘻世界有藐姑射之仙者乎是山四環皆雜植  
松栢桃柳尤多竹西爲文昌祠其巖突起如龍峙一角  
下有泉其平視地而水甘冽多枸杞谷中多老樹高拂  
霄漢坐其中聞風聲泠泠常如秋八月時愚曰君視  
此中與適來洗心堂登拜問答光景相似否緝敬笑語  
都作如是觀愚不覺躍起欣然曰吾今乃愈知靜亦動  
動亦靜靜無靜動無動滿山青黃碧綠無非這箇太極  
也遂相與窮幽捫峻借茵趺坐至夜分罷

### 芝泉會語

同年李緝敬使河東所至事竣津津與諸生談學折節  
理解多所興起愚嘗謂道不遠人只在開眼認識出頭

承當緝敬可謂出頭承當矣按部新安事未竣亦復爲之曰此是弟第一未竣事也諸生默識會中語明日各持見質凡四十餘條愚爲刪而存其七旣而緝敬寄所錄若干語便覺諸生所識尚隔一塵然有可爲實地下手之助者再刪而存其五噫語也乎哉子程子曰若不能存養只是說話

龔生講一貫章緝敬發揮殆盡愚曰今只玩吾道二字便醒謂之吾道便見道只在我身上卽我輩日用尋常子臣弟友之道只消這一點心隨他千頭萬緒自然都貫去要看得孔子極平常始可與言道

道旣言一何須又費許多解所以曾子只下一唯字便了及門人問又只喚出一忠恕字包了忠恕就是一不  
是忠恕外別有箇一曰而已矣者可見道只是這箇丹無別箇卽貫字之義此三字煞有味

世人都有箇貫的方法如好利的以利字貫好名的以名字貫好機械的以機械字貫費許多轉折廻環畢竟貫不去只有這一點心却貫得去夫子明明說終身可行其恕乎又明明說忠恕違道不遠如何此章偏看得直恁玄奧

愚問學問從何處下手緝敬謂這商量不得隨人自家

解悟做去如飢自食渴自飲痛自摩痒自搔愚曰學問  
果是隨人做各人有各人病隨病下藥如何替他先定  
一箇方子雖然于無柵柄處求柵柄其惟誠乎緝敬瞿  
然曰正合弟意

因諸生紛紛談性命愚作轉語云今日且莫談性命還  
從孝弟庸行處做方有着落緝敬曰明道嘗云窮理盡  
性以至于命原無兩事

只一孝字終身用之不盡孝字甚費吾輩矻矻終身有  
多少未盡分處只爲成就箇孝不曾加一分

祐弟問克伐怨欲不行緝敬爲指撥甚透愚曰玩不行

二字便有意味池面浮萍旋開旋蔽不行故也江河活  
水自然不生行故也滔天之流爲堤障之何等費力禹  
之治水水之道也行其所無事也直恁攔當着他不行  
故曰可以爲難矣用力力足欲仁仁至當從此處着眼  
或曰亦有當從難處做者曰克已須於性偏難克處克  
將去是也若不得却大頭腦如治河渠者不從源處淘  
淤處濬終年下椿壩濟得甚事

或疑孔子志學那得便志於矩愚曰離却矩更志箇甚  
麼註曰矩所以爲方之噐也卽今木匠曲尺初做木匠  
便離他不得只是初間不熟還有踰處漸漸熟來却是

以我合他到極熟時我心卽知得之心而應之手矣不  
是泛泛懸空做

諸生問天命之謂性章愚曰此章吃緊在修道二字修  
道乃所以率性也率性只是解箇道字修道始言工夫  
蓋率字活修字嚴率字虛修字實下文戒懼慎獨正是  
修道實地手工夫至中和位育則教自我而立矣切  
莫把修道看得粗若說修道與下文絕不相干只合說  
上二句便合緊接道也者不可須臾離也何故又蛇足  
緝敬曰說得好年兄在實地上用工夫故所見如此  
或問慎獨愚曰認得獨字真便可語慎獨不是閉門兀

坐凡大庭廣衆千萬人在前我起一念人不知便是獨  
緝敬問文王望道未見是見得是未見得愚曰畢竟是  
見緝敬復難之曰旣見安得云未見乎曰正是見纔有  
未見學然後知不足也

緝敬曰道畢竟有未見處否愚曰若不見何以爲文王  
若見何以爲道道無不在無不有雖聖人有所不知不  
能然只描寫出聖人爲善惟日不足之心與夫子何有  
於我則吾豈敢同意

只看視民如傷便知望道未見之意明道作縣常書視  
民如傷四字云某每日常有愧于此

明德先生文集卷之二十三  
因論雞鳴而起公謂爲字在念頭上看愚曰看來爲字  
極喫緊味雞鳴而起四字這爲善念頭直于一日所爲  
處看出非空空存想也舍躬行而但言存想是爲僞學  
問開躲閃路

或言人多爲理欲交戰不能分曉如何做工夫愚曰若  
發念純是天理無人欲何消又做工夫正要從理欲交  
戰處看未發氣象

試問今人曰爾聖賢耶必不敢承當曰爾狂愚耶又不  
肯承當開口便說我不能爲聖賢亦不敢流于狂愚願  
爲中人噫天下更無三等入天下只有聖賢一路除此

便是狂愚那有中人一路故凡汲汲孳孳惟恐失之其  
究淺深不同不失聖賢一路不然亦心乎聖賢而時有  
出入其究中人也凡中人皆有聖賢之心不能擴而充  
之也若安心爲中人便愈趨愈下而狂愚矣譬如危山  
斷橋上有百丈之峰下臨不測之淵非登則墜此處豈  
容歸宿真箇可畏緝敬曰年兄此語非極費苦心不能  
道

天下無生而聖賢者只是純純常常葆養此心不使間  
斷日新而不已自然成箇片段故集義二字是千古做  
聖賢單方



講學只是爲躬行地若認講學便是聖賢卽刻舟求劍或問克已由已二已字同否緝敬曰那有兩箇已如面目上有塵氣難道不是我面目又曰如一箇鏡子山河大地原都是照見的只爲塵翳便不能照一拭磨之山河大地便都歸在這裏面不是去招攝來然從天下做便難故曰爲仁由已而由人乎哉非謂靠不得人也如年兄在此真實爲已人自皈依豈是一一招他來

緝敬曰人多謂講學是好名三代而下士惟恐不好名便是好名的人亦于世道有益因述昔與鄒南師論此弟曰一人唱孝義歌每諄其母云老乞婆與我炊飯却

到各村唱賢孝詞曲唱到好處人有感嘆淚下者有大稱賞者有因而改行者此人亦幡然自悔竟爲孝子却不是虛而往實而歸南師爲之稱嘆不已

緝敬曰昨日和年兄詩云下手須知罷手艱學問須有罷手處愚曰學問只求下手不須求罷手到欲罷不能時便有罷手處

時時下手時時罷手不伎不求何用不藏是下手法是道也何足以藏是罷手法

用舍行藏夫子獨與顏淵非獨謂其無留滯也玩有是夫三字必聖賢有所持以爲行藏地者所以處不空處

出不空出有美玉於斯藏可也沽可也若無是玉便只得求人

要做千古人自不暇與眼前人較量舜爲法於天下可傳於後世我由未免爲鄉人也無此眼界如何能三自反

有問君子無所爭者愚曰此正與三自反章同看我輩自家有多少本分事那有工夫與人較量故曰君子無所爭凡有爭者皆內不足也

孝經軒語錄五則

人心惟危道心惟微惟精惟一允執其中十六字足以

盡堯舜之傳戰戰兢兢如臨深淵如履薄冰十二字足以盡孔曾之傳

孝者千古聖人相傳之心法敬者千古聖人傳孝之心法敬親敬身只是一敬離敬更無孝

堯舜之道孝弟而已矣夫子之道忠恕而已矣孝弟忠恕無兩事

春秋孔子之刑書也孝經孔子之教書也皆天子之事也春秋成而亂臣賊子懼孝經成而上下無怨天下和平通於神明光於四海

有天下國家者不可不知孝經孝經先德教後政刑孝

明倫先生文集 卷之二十三  
經其用大而理約

慎獨堂語錄七則

予嘗問爲人之要于王憲葵先生曰只是要誠要平予居官處世每受用此兩字

七情惟怒爲難制人當盛怒時若說要以理排遣便降伏不下只怒時且不要驟發略存想一想事體輕重如何後來下落如何暴戾之氣卽未必銷鎔亦或稍退回此便是工夫處

有司要錢縱瞞過人瞞不得庫吏門子做官先要無愧此兩項人若但說無愧于心便且瞞過自家

罪疑惟輕聽訟有疑者薄懲之爲得不然恐冤枉未明亦暗自損福

居官非爲名也然期月而頌聲不作則無爲民之實可知矣

做官只平平做去自見知于上人若欲務奇以治民民必病苛

有言仕途不宜太實者先生曰吾之所以動人者患不實也實則何慮詐詐且感吾實矣若以詐御詐庸愈乎

寄弟書語

計二十一條 先生胞弟諱維祐字泰石與先生發明理學殉難贈僉憲

士君子立身要自定根脚中立不倚百折不回若占風

明德先生文集卷之二十三  
望氣東奔西走踏兩家船或寄一家籬下不知雨罷庭  
空酒闌客散作何生活

東西分局非國家之福人皆有局有局則有勝有敗吾  
知有朝廷世道而已不知有局

彼謂我於東西二局未曾立定根脚誠愛我哉非知我  
也我正不干局中立根脚自有立定根脚處

試看風急天寒夜誰是當門定脚人此處要見得定吾  
生平硜硜不能依傍人以至此如某言欲我擇勝而趨  
豈不聞古人有云豈期百鍊剛化作繞指柔若我今日  
由依傍人進一日失身終身莫贖

老子云知我者希則我貴吾以爲惟我貴故知希  
行使止尼非人之所能爲也天也吾之用舍自有天意  
存乎其間於人何尤

世之不知我者多矣卽知我者或謂我才或謂我肯任  
事或謂我出處取與不苟或謂我可以經國之財用此  
果知我也乎哉吾于此數者猶不能也嗚呼此果知我  
也乎哉

世不知我必自有知我者知不知人也用舍時也道之  
將行將廢命也

明王發夢固不可知巖穴終老于我何損

明德先生文集卷之二十三

山中饒有事業惟日不足無暇問出山事

山中有山水可游有花可傍有柳可隨有農夫漁叟可  
話有及門弟子可教有子可訓有琴可彈有書可讀有  
清閒工夫可自在受用此中未嘗不樂

此中之樂不可名言古詩有云只可自怡悅不堪持贈  
君

世人情面多肝膽少卽自號爲肝膽仍是情面而已不  
然則勢利而已偏黨而已朋友列達道之一噫此道之  
存者或寡矣

窮居不損不知不隘此中若無自得處豈能寧耐得下

易曰遯世無悶不見是而無悶又曰確乎其不可拔潛  
龍也要思何以能無悶何以能不可拔當是得力一潛  
字

來書謂某言孝經當進但此時勢須且緩進恐當國者  
不喜不肯行是矣不知世道之所以不壞人心之所以  
不死只此孝之一道足以維綱常名教于不墜耳正謂  
當此時勢此經不可不進喜不喜行不行奚論進孝經  
與他人不同此是明王孝治天下大道理直欲大行此  
經於今日耳蓋孔子一生精神在此今日對症之藥在  
此非深心體認不知此經煞有關係一部孝經是我一

生精力結聚處如有用我者吾當執此以往  
或謂之曰如子之固執子無意仕進者與曰否是爲忘  
世忘世則果然則子有意仕進者與曰否是爲希世希  
世則諂然則子非忘非希其浮沉于世而嘯傲任運者  
與曰否是爲玩世玩世則不恭  
用舍在人可用之具在我子曰用之則行舍之則藏惟  
我與爾有是夫要深味是字無是則行是行甚物事藏  
是藏甚物事

